

南海寄歸內法傳

卷一  
之二

南海寄歸內法傳目錄

卷一

序

一破夏非小

二對尊之儀

三食坐小牀

四餐分淨觸

五食罷去穢

六水有二瓶

七晨旦觀蟲

八朝嚼齒木

九受齋軌則

卷二

十衣食所須

十一著衣法式

十二尼衣喪制

十三結淨地法

十四五眾安居

十五隨意成規

十六匙筋合不

十七知時而禮

十八便利之事

### 卷三

十九受戒軌則

二十洗浴隨時

二十一坐具襯身

二十二臥息方法

二十三經行少病

二十四禮不相扶  
二十五師資之道  
二十六客舊相遇  
二十七先體病源  
二十八進藥方法  
二十九除其弊藥  
三十旋右觀時

## 卷四

三十一灌沐尊儀  
三十二讚詠之禮  
三十三尊敬乖式  
三十四西方學法  
三十五長髮有無  
三十六亡財僧現  
三十七受用僧物

三十八燒身不合

三十九傍人獲罪

四十古德不爲

行資三學。戒在所先。十誦嚴繁。僧祇寬簡。餘參疏密。都不相蒙。五竺南洲。四部迭尙。唯我支那。法護單崇。然一管不足。窺天多師。乃能達義。又况時移地易。機異習殊者乎。戒學大壞。同志應研。焦煇其凶。名曰戒疤。稽無羯磨。寧非誕妄。恆河身命。布施不及。法供養最。讀誦思惟。而先傷腦。豈不悲哉。夷殘而下。幾戒能行。手捉金錢。稟高億祗。東川長袖。一拂生風。高廣大床。千人同夢。瓶鉢之規。安用漉囊之制。無聞若也。持戒明明。觸處相違。違猶曰持。云何而非欺妄。長揖世間。所學何事。吾故曰戒學大壞。同志應研也。豈唯今日。在唐已然。固陋相循。習焉不察。謂予不信。請誦斯篇。歐陽漸識。

南海寄歸內法傳卷第一

唐翻經三藏沙門義淨撰

序曰。原夫三千肇建。爰彰興立之端。百億已成。尙無人物之序。旣空洞於世界。則日月未流。實闐寂於慘舒。則陰陽莫辯。暨乎淨天下降。身光自隨。因餐地肥。遂生貪著。林藤香稻。轉次食之。身光漸滅。日月方現。夫婦農作之事興。君臣父子之道立。然而上觀青象。則妙高色而浮光。下察黃輿。乃風蕩水而成結。而云二儀分判。人生其中。感清濁氣。自然而有。陰陽陶鑄。譬之以鴻爐。品物財成。方之於

延埴者。蓋寡聽曲談之謂也。於是岳峙星分。含靈  
蔓延。遂使道殊九十六種。諦分二十五門。僧佉乃  
從一而萬。物始生。薛世則因六條而五道方起。或  
露體拔髮。將爲出要。或灰身椎髻。執作升天。或生  
乃自然。或死當識滅。或云幽幽冥冥。莫識其精眇  
眇。忽忽罔知所出。或云人常得人道。或說死便爲  
鬼靈。或談不知蝶爲我已。不知我爲蝶形。旣羣迷  
於蜾蠃。復聚惑於螟蛉。比渾沌於雞子。方晦昧於  
孩穉。斯皆未了由愛故生。藉業而有輪迴苦海。往  
復迷津者乎。然則親指平途。躬宣妙理。說十二緣



起獲三六獨法。號天人師。稱一切智。引四生於火宅。拔三有於昏城。出煩惱流。登涅槃岸者。粵我大師。釋迦世尊矣。創成覺龍河九有。興出塵之望。後移光鹿苑六道。盛歸依之心。初轉法輪。則五人受化。次談戒躅。則千生伏首。於是闡梵響於王舍。獲果者無窮。酬恩惠於父城。發心者莫算。始自了教會。初願以標誠。終乎妙賢契。後期於結念。住持八紀。弘濟九居。教無幽而不陳。機無微而不納。若泛爲俗侶。但略言其五禁。局提法眾。遂廣彰乎七篇。以爲宅有者大非。戒興則非滅。存生者小過。律顯



則過亡。且如恚損輕枝。現生龍戶。慈濟微命。交升  
帝居。善惡之報。固其明矣。於是經論兼施。定慧俱  
設。攝生之紐。唯斯三藏乎。旣而親對大師。教唯一  
說。隨機拯物理。亡他議。及乎薛舍。初辭魔王。惑歡  
喜之志。熙連後唱。無滅顯亡疑之理。可謂化緣斯  
盡。能事畢功。遂乃跡滅兩河。人天掩望。影淪雙樹。  
龍鬼摧心。致使娑羅林側。淚下成泥。哭者身邊。血  
如華樹。大師唱寂。世界空虛。次有弘法。應人結集。  
有五七之異。持律大將。部分爲十八之殊。隨所見  
聞。三藏各別。著下裙則裙有偏正。披上服則葉存。

狹廣同宿。乃異室繩圍。兩俱無過。受食以手執。畫地二並亡愆。各有師承。事無和雜。有部則正。餘三並偏。有部則要。須別室。正量以繩圍牀。有部手詣。僧祇畫地也。諸部流派。生起不同。西國相承大綱。唯四。一阿離耶。莫訶僧祇尼迦耶。唐云聖大眾部。分出七部。三藏各有十萬頌。合三十萬頌。唐譯可成千卷。二阿離耶。悉他陞攏尼迦耶。唐云聖上座部。分出三部。三藏多少同前。三阿離耶。慕攏薩婆。悉底婆拖尼迦耶。唐云聖根本說一切有部。分出四部。三藏多少同前。四阿離耶。三蜜栗底尼迦耶。

唐云聖正量部。分出四部。三藏二十萬頌。律有三  
十千頌。然而部執所傳多有同異。且依現事言其  
十八。分爲五部。不聞於西國耳。其間離分出沒部  
別名字。事非一致。如餘所論。此不繁述。故五天之  
地及南海諸洲。皆云四種尼迦耶。然其所欽處有  
多少。摩揭陀則四部通習。有部最盛。羅茶信度。西  
印度國名。則少兼三部。乃至正量尤多。北方皆全  
有部。時逢大眾。南面則咸遵上座。餘部少存。東裔  
諸國雜行四部。從那爛陀東行五百驛。皆名東裔。  
乃至盡窮有大黑山。計當土蕃南畔。傳云是蜀川

西南行可一月餘便達斯嶺。次此南畔逼近海涯。  
有室利察坦羅國。次東南有郎迦戍國。次東有社  
和鉢底國。次東極至臨邑國。並悉極遵三寶。多有  
持戒之人。乞食杜多是其國法。西方見有實異常  
倫。師子洲並皆上座而大眾斥焉。然南海諸洲有  
十餘國。純唯根本有部。正量時欽。近日已來少兼  
餘二。從西數之有婆魯師洲。末羅遊洲。卽今尸利  
佛逝國是。莫訶信洲。訶陵洲。坦坦洲。盆盆洲。婆里  
洲。掘倫洲。佛逝補羅洲。阿善洲。末迦漫洲。又有小  
洲不能具錄。斯乃咸遵佛法。多是小乘。唯末羅遊

少有大乘耳。諸國周圍或可百里。或數百里。或可百驛。大海雖難計里。商舶串者準知。良爲掘倫初至交廣。遂使總喚崑崙國焉。唯此崑崙頭捲體黑。白餘諸國與神洲不殊。赤腳敢曼總是其式。廣如南海錄中具述。驩州正南步行可餘半月。若乘船纔五六潮卽到。上景南至占波。卽是臨邑。此國多是正量。少兼有部。西南一月至跋南國。舊云扶南。先是裸國人多事天。後乃佛法盛流。惡王今並除滅。迥無僧眾。外道雜居。斯卽瞻部南隅非海洲也。然東夏大綱多行法護。關中諸處僧祇舊兼江南。

嶺表有部先盛而云十誦四分者多是取其經夾  
以爲題目。詳觀四部之差律儀殊異。重輕懸隔。開  
制迢然。出家之侶。各依部執。無宜取他輕事替己  
重條。用自開文。見嫌餘制。若爾則部別之義不著。  
許遮之理莫分。豈得以其一身徧行於四。裂裳金  
杖之喻。乃表證滅。不殊行法之徒。須依自部。頻毗  
娑羅王夢見一氎裂爲十八片。一金杖斬爲十八  
段。怖而問佛。佛言我滅度後一百餘年有阿輸迦  
王威加瞻部。時諸苾芻教分十八。趣解脫門。其致  
一也。此卽先兆。王勿見憂耳。其四部之中大乘小



乘區分不定。北天南海之郡。純是小乘。神州赤縣之鄉。意存大教。自餘諸處。大小雜行。考其致也。則律檢不殊。齊制五篇。通修四諦。若禮菩薩。讀大乘經。名之爲大。不行斯事。號之爲小。所云大乘。無過二種。一則中觀。二乃瑜伽。中觀則俗有真空體虛。如幻。瑜伽則外無內。有事皆唯識。斯並咸遵聖教。孰是孰非。同契涅槃。何真何僞。意在斷除煩惑。拔濟眾生。豈欲廣致紛紜。重增沈結。依行則俱升彼岸。棄背則並溺生津西國。雙行理無乖競。旣無慧目。誰鑒是非。任久習而修之。幸無勞於自割。且神



州持律諸部互牽。而講說撰錄之家。遂乃章鈔繁雜。五篇七聚。易處更難。方便犯持。顯而還隱。遂使覆一簣而情息。聽一席而心退。上流之伍。蒼髭乃成。中下之徒。白首寧就。律本自然。落漠讀疏。遂至終身。師弟相承。用爲成則。論章段則科。而更科。述結罪則句。而還句。考其功也。實致爲山之勞。覈其益焉。時有海珠之潤。又凡是製作之家。意在令人易解。豈得故爲密語。而更作解嘲。譬乎水溢平川。決入深井。有懷飲息。濟命無由。準檢律文。則不如。此論斷輕重。但用數行。說罪方便。無煩半日。此則

西方南海法徒之大歸矣。至如神州之地。禮教盛行。敬事君親。尊讓耆長。廉素謙順。義而後取。孝子忠臣。謹身節用。皇上則恩育兆庶。納隍軫慮於明發。羣臣則莫不拱手履薄。呈志於通宵。或時大啓三乘。廣開百座。布制底於八澤。有識者咸悉歸心。散伽藍於九宇。迷途者並皆迴向。皇皇焉農歌畎畝之中。濟濟焉商詠舟車之上。遂使雞貴象尊之國。頓賴丹墀。金隣玉嶺之鄉。投誠碧砌。爲無爲事。無事斯固無以加也。雞貴者。西方名高麗國爲俱俱。吒。譬說羅。俱俱。吒是雞。譬說羅是貴。西方傳云。